



bondia.aruba@gmail.com

Famoso den añanan '80 na Europa:

Artista Arubiano Bobby Farrel (Boney M) ta fayece

SINT PETERSBURG/ORANJESTAD.- Bobby Farrel, cantante di oriundo Arubano cu den añanan 70 y 80 a gosa di masha hopi fama na Europa como miembro di e grupo musical “Boney M” a fayece ayera nochí den camber di un hotel di e ciudad Ruso Sint Pietersburg. Farrel tabatin 61 aña di edad. E la nace na 1949 na San Nicolas, Aruba. Na edad hopi hoben, Farrel a bandona Aruba pa bay traha como nabegante bordo di barconan crucero cu tabata nabega entre pais nan di Scandinavia. Despues di a biba na Norwega pa algun aña, Farrel a bay biba na Hulanda, unda el a traha pa hopi aña como DJ den centronan nocturno di

Amsterdam.

Su estilo unico pa baila y anima fiestanan a capta atencion di e productor Aleman, Franz Reuther (number artistico Frank Farrian), kende mesora a contrata Farrel pa forma parti di un grupo musical nobo cu e la duna e number di “Boney M”.

Cu algun interrupcion, Bobby Farrel a forma parti di e grupo aki te na 1986, cosechando masha hopi exito cu hitnan manera “Daddy Cool”, “Ma Baker” y “Belfast”. Detaye interesante ta cu aunke Farrel tabata “canta” su partinan durante actuacionnan en bibo, nunca a uza su bos riba e grabacionnan di Boney M. Tabata Frank Farrian

cu a haci grabacionnan di tur e partinan vocal cu supuestamente tabata di Bobby Farrel.

Bobby Farrel ta laga atras dos yiu muhe di dos matrimonio distinto. Den un ultimo entrevista cu un periodista Mericano, Farrel a bisa cu tabata su intencion pa na 2011 bin biba bek na Aruba pa pasa su añanan cu a ked’e na su isla natal. “Mi no sa kico mi ta bay haci. Kisas lo mi bira ‘minister di banana’”, Farrel a bisa e periodista.

